

**Malaysia Sentiasa Sokong Kuat Perjuangan Palestin - Najib
Bernama
14 Februari , 2012**

KUALA LUMPUR, 14 Feb (Bernama) -- Datuk Seri Najib Tun Razak berkata Malaysia sentiasa memberi sokongan yang padu terhadap perjuangan rakyat Palestin.

Perdana Menteri berkata kerajaan Palestin tahu bahawa pendirian Malaysia terhadap is-isu melibatkan Palestin sentiasa konsisten walaupun ketua pembangkang Datuk Seri Anwar Ibrahim baru-baru ini dilaporkan memberi sokongan kepada Israel.

"Saya tahu dan saya berpendapat Pertubuhan Pembebasan Palestin (PLO) tahu bahawa itu (sokongan kepada Israel) bukanlah pendirian kita.

"Mereka (rakyat Palestin) tahu kerajaan Malaysia selama ini menyokong kuat perjuangan Palestin dan akan terus memberi sokongan padu," katanya kepada pemberita selepas merasmikan Minggu Pembinaan Antarabangsaan di sini Selasa.

Beliau diminta mengulas sama ada Malaysia akan mengeluarkan kenyataan yang jelas mengenai kekecewaan yang diluahkan oleh pihak berkuasa Palestin berhubung kenyataan Anwar mengenai Israel itu.

Kekecewaan dan kebimbangan itu disampaikan oleh Perdana Menteri Palestin Ismail Haniyeh kepada Pengerusi Pentadbiran Yayasan al-Quds Malaysia, Nasharuddin Mat Isa, di Kuwait baru-baru ini.

Nasharuddin, yang juga Anggota Parlimen Bachok daripada Pas, dilaporkan berkata Ismail dan rakyat Palestin keliru dan bimbang setelah Anwar membuat kenyataan kepada majalah antarabangsa Wall Street Journal baru-baru ini, bahawa beliau menyokong usaha melindungi keselamatan Israel.

Najib berkata kenyataan Anwar itu pastinya mengundang rasa kecewa rakyat Palestin.

"Jelas sekali mereka amat kecewa mendapati kenyataan (Anwar) sedemikian dibuat.

"Kita tidak bolehlah menggunakan apa yang kita kata kepada khalayak yang berlainan untuk melihat hasil yang berlainan. Kita harus konsisten kerana apa yang kita cakap, walaupun di Bachok atau Jerantut, ia boleh dilaporkan ke seluruh dunia," kata Perdana Menteri.

Najib berkata Pas pun telah mendesak Anwar supaya menyaman WSJ ataupun memintanya menarik balik dan memberi penjelasan apa yang beliau (Anwar) katakan kepada majalah itu.

---BERNAMA

Hakcipta © 2012 BERNAMA

Source: <http://www.bernama.com/bernama/v6/bm/newsindex.php?id=645479>